

## Lesson 89

### Aka-aka Mahāpin!

Assalamu alaikum me' bagayku mapakalehin. Tiya' ku katakdilan we' Tuhanin magaka-aka si ka'am. Iye Tuhan po'on kasanyanganin. Kabaya'annen, we' kēmon me' a'ahin tasabutde duk maglilla' nuhut lān bakas minemesnen, supaya a'ahin makajari kinimatan bentel we' ne duk supaya siye sinakup dem kasanyanganne te'edin salama-lama. Sinna kami we' makajari kami magpakale balik si ka'am ellew inin programabi inēnan “*Lānin duk a'ahin manjari bentel si matahan Tuhan*”.

Si pagistadite dem Kitab Injilin, bakas takalete we' pag ubus Isa AlMasi Panuhutanin ellum balik da'akne me' tindeggen, pa'inne, “*Pī ka'am si kēmon kalahat-lahatan si dunya duk mahalayakun bi aka-aka mahāpin si kēmon manusiya*.” (Markus 16:15) Duk pag ubus si Isa pa'angkat hap surga', niya' nulat dembuwa' a'a inēnan si Paul. A'a inin bakas magāgama manamal duk bakas binasane me' manuhut pu si Isahin ubus pinda ne ateynen bu bennal ne iye nuhut si Isa. Pa'in si Paul,

*“Tapene' ku we' Tuhanin duk kawakilan ku we' ne magmahalayak aka-aka mahāp amban iyehin. Aka-aka mahāp inin pananggup Tuhanin awwalley duk dina'ak we' ne sinulat si me' nabinen dem kitab!.....Ga'i ku te'ed iya' magmahalayak aka-aka mahāp sabab Isa AlMasihin. Pegge' kēmon makahagad si aka-aka mahāp inin..... la'i balakat Tuhanin maluwas siye amban duseden. Amban aka-aka mahāp inin kata'uhante bang sa'ingge supaya kimmatan Tuhanin me' a'ahin bentel. Subey hadja siye sandel dembūs-būs pu Isa AlMasi!”*  
(Roma 1:1,2,16,17)

**Aka-aka hāp, aka-aka hāp, aka-aka hāp!** Ine be aka-aka mahāp inakahan kite magbalik-balik dem Lapal Tuhan inin? Ellew inin – pegge' tinabangan kite bi we' Tuhanin – mabaya' kite bi missā sabab Aka-aka Mahāp minahalayak dem Kitab Masutsihin. Saguwa' subey dahu' kite bi missā sabab **aka-aka mala'atin** mangkin kite bi missā sabab **Aka-aka Mahāpin**.

Ine **aka-aka mala'atin**? Kaw ta'esebbi we' tagna' awwalley, pag ubus papanjari Tuhanin dunya duk langitin, papanjari Tuhanin Apu' Adam duk Sitti Hawa duk patenna'ne siye dem likus jambangan Eden. Pinapanjari siye we' Tuhanin supaya kata'uhande iye, malasa si iye,

kahagad si iye, duk mudji iye salama-lama. Saguwa' tinstingan siye we' Tuhanin, pa'inne pu Apu' Adam: “Makajari kakannu kēmon bayu'an buwa' kayu dem likus inin. Saguwa' da'a te'ed kakanun buwa' kayu si tengnga' likusin. Pegge' si ellew pamangannu buwa'ne miya'an iye ne ellew kamateynun!” Iye aka-aka mala'atin, we' pakale Apu' Adam duk Sitti Hawa si sawehin, hātinin Nakura' Seyitanin, nassat siye mangan buwa' kayu mangga'i dina'ak kinakan si siyehin. Sabab duse Apu' Adam duk Sitti Hawa miya'an, pa'asek sasewin duk kamateyin si dunya, duk kaleggeyan siye duk sampay kēmon tubu'den. Daran ne takaletē eli'an inin, pina'in: “Bang beytu panaki, ga'i du padeheng sakihin si a'a tagna' masakihin!” Inakahan kite aka-aka mala'atin dem Lapal Tuhanin, pag pa'inne:

*“Manusiya'in suku'nen matey mintedde **ubus bu hukum Tuhanin ne!**....Pitu du iyan Panuhutanin – ngahukum kēmon me' a'ahin. Labo'anne hukuman kēmon mangga'i matalew si Tuhanin pegge' bakas maghinangan siye me' hinangan kabunsihan Tuhanin duk pegge' luwal bakas bissā-bissāhande pangkal Tuhanin!”* (Hibrani 9:27; Judas 15)

Hangkan, iye aka-aka mala'atin, we' kēmon kite bi a'a dusehan duk **hukum Tuhanin kite bi duk hukumanne mabentelin!**

Saguwa' Aka-aka Mahāpin inin, we' bisan pe la'i dem likus Eden minahalayak ne we' Tuhan Mama'ase'in, we' si sinōng papīne si dunya dembuwa' A'a ga'i kaleggeyan we' duse duk we' inanakan we' budjang. A'a masutsi inin, **Mangalekkat** mabentelin, paglilla'ne dinen pinapatey manjari kurban pagbayed duse Apu' Adamin duk kēmon tubu'nen. Mangalekkat mangga' niya' dusenen iye matewwa' pangalegga patut si kitehin bi sabab duseten bi. Iye Aka-aka Mahāp minahalayak we' Tuhanin ellew pag duse Apu' Adam duk Sitti Hawahin.

Ekka a'a dina'ak we' Tuhanin magmahalayak, we' si sinōng pitu Mangalekkatin, inēnan isab **AlMasihin**. Kēmon me' nabihin niya' aka-akade sabab AlMasihin, supaya kēmon a'a makajari tasabutde we' iye ne iyan Dembuwa' tapene' magbaya' we' Tuhanin, bang tekka ne iye. Upama, Nabi Shi'ya, ellum iye me' pitu' hatas tahun dehellu amban AlMasihin, pina'al we' ne bang sa'ingge AlMasi inanakan, pa'inne: “*Niya' iyan budjang betteng duk nganak iye lella duk inēnan du iye Immanuel. (Ma'ana Immanuelin – Tuhanin palamud si kite bi.)*” (Mateo 1:23; Shi'ya 7:14) Niya' isab nabi seddili, Nabi Mika, bakas pa'alne we' AlMasihin pitu si dunya amban surga' duk inanakan iye si puweblo **Betlehem**. Bu iye du te'ed puweblo panganakan AlMasihin. Bu pina'al inin we' Nabi Mika inday bang piye hatas tahun dehellu amban panganak pu AlMasihin.

Saguwa' duma'in hadja pina'al we' me' nabihin sabab panganak pu AlMasihin. Bakas pa'alde isab we' **magsandal AlMasihin duk matey**

ganti' madusehanin. Upama, sinulat we' Nabi Da'ud we' teyikutan a'ahin AlMasihin duk binasade iye, logsokde tangannen duk bettisnen duk papateyde iye. Duk duma'in hadja pina'al we' Nabi Da'udin we' matey AlMasihin, pa'alne isab we' **pinakellum AlMasihin we' Tuhanin** amban kamateyne. Sa miya'an pureba Tuhanin we' AlMasihin dendangan iye Manimbul pinapitunen nimbul me' manusiya'in amban pangalegga duseden.

Kulang me' a'ahin nganjawab sabab panganak pu AlMasihin, saguwa' ekka a'a kuwe' bentuk ga'i kumpulmi bang takalede we' matey iye duk ellum balik. Ga'i tasabutde we' ga'i hinang Tuhanin ine bisan AlMasi bakas pinapitunen diniyawa'an we' a'a. Me' a'a ma'ekkahin ga'i tahātide we' iye te'ed maksud Tuhanin we' AlMasihin subey nandal sa miya'an **ganti'te bi** pegge' malasa Tuhanin si kite bi. Saguwa' iye du isab pina'al we' me' nabihin, pa'inde: *“Iye kabaya'an TUHANIN we' nandal kabinsana'an iye; kamateynen du, iye kurban maka'ampun dusehin!”* (Shi'ya 53:10)

Kahagad ke kite bi si me' nabihin? Pa'inte we' kahagad kite si siye. Bang bennal te'ed kite bi **kahagad si me' nabihin**, subey isab kite bi **kahagad si me' sinulatden**. Subey ta'essebte we' me' nabihin duma'in missā amban di pikilande. Inurungan siye pikilan we' Tuhanin bang ine subey pina'inden. Hangkan, bang ga'i kite bi ngatu kahagad si me' nabihin, sine te'ed ga'i tineyima'ten bi? Ga'i teyima'te bi **Tuhanin** – pegge' iye du mangurung pikilan si me' nabihin magpa'al we' AlMasihin subey matey manjari kurban pamuwas duse.

Pegge' kinalasahan we' Tuhanin manusiya'in duk ga'i iye mabaya' we' niya' lepas sabab dusenen hangkan palanune we' AlMasihin subey matey. Nesessita du we' A'a bentel mamateyin ganti' me' mangga'i mabentelin supaya siye tatimbulne amban hukuman Tuhanin. Iye hep hātinene bang sinōngan bili-bilihin duk kambing hinang kurban masaley. **Isa AlMasi**, inanakan we' budjang sabab balakat Tuhanin, **iye kurban mangga' niya' salla'-salla'nen duk iye kurban panambusanin**, pangurung we' Tuhanin. Pegge' kuwe'itu niya' ne kurban hāp manamalan duk jukup ne sampay salama-lama, ga'i ne nesessita we' pekkeng pe kite bi magkurban ga'i hāp bu umbaga'an du hadja. Ta'essebbi ke bang ine pina'in si Isa Panuhutanin diyata' olom peg sōng matey iye? Pa'inne, *“Ubus ne hinangkun!”* (Yahiya 19:30) Ubus ne bayedanne utang kami sabab dusehin, mintedde du bayedanne bu sarang ne sampay salama-lama. Luwal hadja iye subey hinangten, **kahagad!** Bakas tabatsate ne pina'in dem Kitabin, pa'inne: Aka-aka Mahāp sabab kamatey duk ka'ellum Isa AlMasi mabalikin *“si kēmon makahagad si inin, la'i balakat Tuhanin maluwas siye amban duseden!”* (Roma 1:16)

Keyimanne te'ed, ekka a'a ga'i ngatu kahagad si iye, pa'inde we' kēmon miya'an sabab kamatey si Isa duk ka'ellumne mabalikin, istori hininang-hinang hadja. Saguwa' bang magistadi kite bi dem Kitab Injil, tasabutte we' kēmon pina'al we' me' nabihin sabab AlMasihin **tuman** te'ed we' Isa AlMasi. **Kēmon.....**sabab panganak iyehin, ka'ellumnen, kamateynen, ka'ellumne balikin, duk pa'angkatne hap surga'in. Hangkan pina'in dem Kitab Injil we' *“Isa AlMasi matey supaya kapuwasanne duseten bi kuwe' sinulat dem kitabin, duk pag ubus AlMasi matey, kinubul iye duk katellum bahanginen ellum iye balik amban kamateynen kuwe' sinulat dem kitabin.”* (1 Korinto 15:3,4) **Kēmon palabey te'ed sa pina'al we' me' nabihin.** Me' a'a mabunsi pu si Isahin udji'de iye, binasade iye duk papateyde iye, duk me' a'a mamalasa si iyehin kubulde iye. Saguwa' ga' iye ta'amban matey dem kubulne. Bakas takitete ne we' katellu ellewnen pag ubus iye pinapatey diyata' olom, niya' tellu dende pī subu-subu pe hap lingab bakas pangubulande si Isahin, ubus bu kitede we' luka ne kubulin duk ga' ne niya' diyalemne! Pag ubus si Isa matey duk ellum balik, pakitehanne dinen si me' tindeggen diyalem ampatpū' ellew. Pag ubus iye ellum balik niya' labi lime hatas a'a ngite iye. To'o te'ed miya'an! Kamateyin, iye dembuwa' me' banta manusiya' manamalin, saguwa' tada'ag kapatut kamateyin we' AlMasihin! Sabab ka'ellum si Isa mabalikin, iyan purebanen we' tineyima' we' Tuhanin kurban si Isahin pamuwas kēmon duse me' manusiya'in supaya kēmon makahagad si iyehin sinakup si umulne salama-lamahin.

Inin Aka-aka Mahāpin. **Matey Panuhutanin Isa AlMasi supaya ānanne dusenun, duk paguwa' iye amban dem kubulne katellu ellewnen supaya kew ka'urunganne umul salama-lama.** Maksud Aka-aka Mahāp inin supaya timbul kēmon makahagad si iyehin. Hangkan hep, inin panilew subey sinambungannun: **“Kahagadnu ke inin?”** Pa'in Lapal Tuhanin: **“Ellew inin ellew pagtimbulin! Bang takalenu Aka-aka Mahāpin, da'a kew magtuwas atey! Kahagad kew!”** Hinangante mahāp tahnangten duma'in ka'udjudannen meketimbul kite, pegge' **ga'i sarang hinangannu mahāpin supaya tumbas si ka'uhin hap surga'.** Duma'in hep **pinabellihan** we' Tuhanin pagtimbulnen; kabaya'annen **pangurungne** si ka'u! Kaw hāp lessanu bang kew maghinangan hāp, nambahayang, atawa muwase, saguwa' ga'i iyan sarang duk kaduhulan Tuhanin! Niya' hadja dembuwa' lān supaya kew tapa'asek si surga'.

- 1.) Subey kew dahu' **magbennal** we' dusehan kew duk we' ga' niya' basagnu mekesulut Tuhanin.
- 2.) Ubus subey kew **kahagad** we' Isa AlMasi Manimbul pinapitu we' Tuhanin duk matey diyata' olom supaya ānanne dusenun, duk we' pakellum Tuhanin iye amban kamateyne supaya kew urunganne umul salama-lama.

Bang kew kahagad si Aka-aka Mahāp inin, **kabugtu'annu we' bino'o kew hap surga' bang ne kew matey**, pegge' pananggung inin we' Tuhanin dem Lapalne. Pa'inne we' makajari **kata'uhante** we' ka'urungan kite umul salama-lama, **bang kite sandel** pu si Isa AlMasi Panuhutanin. (1 Yahiya 5:9-13)

Na, kuwe'itu pakale kite bi si aka-aka dembuwa' a'a amban lahat seddili, pa'inne:

Akahante ka'am bang sa'ingge panuhutku Isa AlMasihin. Kabata'kun pe kapangandelan ku te'ed nambahayang min lime de ellew, duk muwase bang bulan puwase, saguwa' ga' kata'uhanku bang hap tungan ku bang ku matey. Ekka a'a tilew-tilewku, saguwa' ga' niya' ta'u ngakahan aku papasti'. Saguwa' pag magistadi ku dem Kitab Injil, tasabutku we' **makajari kata'uhanku bang hap tungan ku bang ne ku matey**, pegge' pa'in Isa AlMasi dihananne dem Kitab Injil, pa'inne: *“Sabennal akahante ka'am, sine-sine makakale me' panolo'kun duk kahagad si mamapitu akuhin, ellum iye salama-lama. Ga'i iye tewwa' hukuman Tuhanin. Ga'i iye legga Tuhanin saguwa' ellum iye salama-lama.”* (Yahiya 5:24) Pa'inne isab: *“Aku magpakellum me' pateyin duk aku po'on umulin. Sine-sine sandel si aku, ellum du iye bisan ne iye matey!”* (Yahiya 11:25) Tasabutku ne we' ga'i tatimbulku dikun sabab di hinangankun. Hangkan magsusun ku duk lebbahanku me' hinanganku miya'an duk sandel ne ku pu si AlMasi. Sabab iye hep pina'al kēmon me' nabihin, pa'inde, *“Sasuku masandel si iyehin, inampun du me' duseden sabab bakas tahinang si Isahin.”* (Hinangan 10:43) Manjari, ngase-ngase ku hadja pu si Isa AlMasi Panuhutanin. Bu kemuwe miya'an sampay kuwe'itu urungan Tuhanin kasanyangan dem pikilankun. Ga'i ne sasew dem pikilankun. Pesōngankun hāp duk danta' sabab tahinang si Isa diyata' olomin. Kuwe'itu nuhut AlMasi ne ku, bu bang petekka niya' kasasewanku duk kabinasahanku pegge' magseddili pasandelankun duk pikilan me' usbakun duk bagaykun, saguwa' masi sanyang dem ateykun. Kasanyangan Tuhanin du diyalem ateykun duk pikilankun. Duk si Isa mangurungan aku kasanyangan iyan, pa'inne: *“Da'a ka'am ulali' bang ka'am kabunsihan we' me' a'a mangga'i manuhut Tuhanin. Essebun bi we' kabunsihande ku dehellu amban ka'am.....Iye pangambanku si ka'amin atey sanyang. Kasanyangan inin amban aku duk ga'i inin magsali' duk kasanyangan si dunyahin. Hangkan da'a ka'am suse dem ateybi duk da'a ka'am tinalew.”* (Yahiya 15:18; 14:27) Duk, me' bagayku, me' tahinang Panuhutan si akuhin duk diyalem ateykun, tahinangne du isab si ka'am dangan-dangan. Da bayu' hadja pinākune amban ka'amin: **We' pangurungnu ateynun si iye dembūs-būs**. Ubus iye du mangahinang sinduwehin. Pegge' Panuhutanin si Isa dihananne pa'inne, *“Pitu ka'am si aku, sine-sine ka'am pekkeng duk kabohatan supaya ka'am humali.*

*Teyima'un bi panolo'kun duk ngaya ka'am amban aku, pegge' hāp ku duk diyawa' ateykun, manjari humali ne dem ateybin.*” (Mateo 11:28,29)

**Pekkeng ke kew duk kabohatan sabab dusenun?** Mabaya' ke kew humali dem ateynun? Bang kew kahagad si Aka-aka Mahāpin we' matey AlMasi para si kahāpannu duk ellum iye balik para si kahāpannu, ampun Tuhanin du dusenun, kimmatanne kew bentel, duk sulatne ēnnun dem Libru Pangalistahan ēn me' a'a tege umul ga' tamanannen. Bang kahagadnu Aka-aka Mahāp inin, malkahan Tuhanin kew we' suku' si iye kew duk papīne Niyawa si Isahin diyalem ateynu. Niyawa Sutsi inin patenna' diyalemnu, ganti'anne ateynun, kawul-pi'lnun, duk kēmon addatnun, pegge' pina'in dem Kitab, pa'inne: *“Bang a'ahin magdambuwa' ne duk AlMasi, kuwe' ne iye ba'ahu pinapanjari. Kēmon addatne duk hinanganne mala'at matu'uhin magtamanan ne, duk kuwe'itu ba'ahu ne te'ed iye!”* (2 Korinto 5:17)

Bagayku, bisan kew intag-intag, duk bisan sa'ingge-sa'ingge parasahannun, bang lella ke kew atawa dende, bahi' ke atawa bata', makajari pangurung Panuhutanin Isa AlMasi si ka'u umul ba'ahuhin – **bang kew sandel si iye.** Matey iye para si ka'u supaya kew makajari ellum salama-lama magsumbaya' duk Tuhanin. **Kahagad ke kew si Aka-aka Mahāp inin?**

Hāp isab bakas pakale kew ellew inin.....

Karayaw iledjiki'an kew we' Tuhanin. Urungante ka'am dembuwa' ayat amban dem Kitab missā sabab kabugtu'an mahāp manamal pangurung Tuhanin si kēmon masandel si Aka-aka Mahāp amban Tuhan sabab pagtimbulin. Pa'in Kitabin:

*“Tinimbul ne kite we' [Tuhanin] duk tapene' we' ne hinangne me' a'ane, duma'in pegge' niya' hāp bakas tahinangte duk inin panumbasne kitehin. Saguwa' hangkan inin hinangne si kite pegge' kalasahanne duk ka'ase'anne kite, duk pegge' andang sakapne masa ga' pe pinapanjari dunyahin we' pakitehanne lasanen duk ase'nen si kite sabab tahinang Isa AlMasihin. Kuwe'itu pinakita'u ne si kite lasa duk ase' Tuhanin pegge' bakas pitu ne Isa AlMasi manimbul kitehin bi. Tada'ag we' ne kapatut kamateyin. Duk bang kahagadte aka-aka mahāp sabab Isa AlMasihin niya' umulte ga' tamanan si surga'.”* (2 Timoteo 1:9,10)

Wassalam